

# ԲԱՆԱՍՏԵՂԾՈՒԹԻՒՆՆԵՐ

---

Լ Ե Ռ Ե Ն Ց Ի

---

\* \*

Ես լալիս էի. ինչո՞ւ— չը գիտեմ.  
Սիրո՞ւ էր նա լաց, թէ ցաւքց նըսեմ...  
Բայց արտասուքըս մեղմիկ շիթերով  
Հանգիստ էր տալիս հոգուս իմ վրդով:

Ես խնդում էի. թւում էր, թէ կրկին  
Ժպտաց երեսիս շողն արեգակին,  
Բայց ճնշած էր սիրտս՝ ասես թէ բեռից...  
Ինչպէ՛ս կուզէի, ա՛հ, ես լալ նորից:

\*\*\*

Ամպերում վառւեց կայծակը սրնթաց-  
Շըլացնող լոյսը շուրջ տարածւեցաւ,  
Դողաց և մարեց. որոտը թնդաց.—  
Կայծակը խըփեց՝ մի ծառ չորացաւ:

Այդպէս խաւարում իմ կեանքիս վրդով  
Աչքիս երևցաւ տեսիլ սիրավառ,  
Այրեց նա սիրտըս աչքով բոցավառ,  
Նորա բոլոր հիւթը ցամաքացնելով:

20 նոյեմբերի, 1890 թ.

## ԱՌԱՌՈՏԵԱՆ ԱՍՏՂԸ

---

Լուսադէմը դեռ չէր ըսկսել  
Գիշերային քողը պատռել,  
Երբ, ինչպէս կայծ, յանկարծակի  
Աստղը վառւեց երկնքում:  
Դաշտում խաւար ու ամալի  
Նա մենակ էր փայլփրլում:

Բարձունքներից եթերական  
Դիտում էր նա իր շուրջն համայն,  
Խաւարի մէջ որոնելով  
Լոյս, հորիզոն լայն ու բաց,  
Երբ արշալոյսն նըկարւելով,  
Աննկաա ելաւ նորա դիմաց:

Ժպտաց աստղը ժպտով պայծառ.  
Նորա տեսքիցը գեղեցկավառ.  
Ժպտաց, դողաց և գունատւեց...  
Կրկին ըռպէ... սիրական  
Արշալոյսը վառւեց, կրակւեց —  
Աստղը մարեց յաւիտեան:

## ԵՐԿՈՒ ՏԵՍԻԼ

---

Իմ կեանքիս մէջ տըխրագին  
Երկու պայծառ տեսիլներ  
Երևեցան իմ աչքին,  
Ասես երկու աստղներ:

Երկու պայծառ տեսիլներ  
Եղան կեանքիս փարոսն վառ,  
Մէկըն իբրև քաղցրը սէր,  
Միւսըն՝ անմահ գաղափար:

Պարգևեցին նրանք Հոգւոյս  
Կենդանութիւն խնդալից  
Եւ արցունքներ խռովալոյզ  
Քաղեցին իմ աչքերից:

Անցան տարիք: Սպառնալի  
Բերին կեանքիս մըրըրիկներ,  
Բայց միշտ մնացին պաշտելի—  
Այն երկու վառ տեսիլներ: